

АЗБУКА ВЕРЫ



Акафист преподобному Феодосию Тотемскому

Молитвослов 2023

Акафист преподобному Феодосию Тотемскому



Кондак 1

Возбранный чудотворче и изрядный угодниче Христов, всем с верою приходящим источаяй многоцелебные дары, похвальная восписуем ти творящи всечестную память твою: ты же, яко

имея дерзновение ко Господу, моли спастися душам нашим, да зовем ти:

Радуйся, Феодосие, великий чудотворче.

Икос 1

Ангельское твое во плоти житие провидев всея твари Создатель, от юности уготова ты в жилище себе, Егоже ты обителищем быти уведевше похвальная восписуем ти:

Радуйся, благочестивых родителей богоприятное испрошение:

радуйся, от благочестиваго корене отрасль святейшая.

Радуйся, от юности твоея Богу послуживый:

радуйся, воздержанием Ангелов удививый.

Радуйся, в молитвах теплый предстателю:

радуйся, скорбящих сладкое утешение.

Радуйся, просящим скорый помощниче:

радуйся, болящим скорый и безмездный врачу.

Радуйся, земный ангеле:

радуйся, небесный человеце.

Радуйся, сосуде избранный Духа Святаго:

радуйся, телес наших здравия и душ спасения ходатаю.

Радуйся, Феодосие, великий чудотворче.

Кондак 2

Видя тщету мирских попечений, блаженне Феодосие, жизнь твою не миру, но Богу посвятил еси: сего ради оставив дом родителей твоих, водворился еси с работающими Богу во иноческом житии, во еже непрестанно и благоприятно вопити Ему: Аллилуиа.

Икос 2

Разум плотскому человеку неразумный от юности твоея стяжавый, преподобне отче Феодосие, горняя мудрствовал еси, а не земная, темже взываем ти:

Радуйся, мудрости небесныя жилище:

радуйся, терпения адаманте.

Радуйся, братолюбия зеркало:

радуйся, иноков правило.

Радуйся, на скрижали сердца твоего закон Божий написавый:

радуйся, сам себе и весь живот твой Христу Богу предавай.

Радуйся, ум твой к небеси вперивый:

радуйся, страх Божий в сердце твоём до конца сохранивый.

Радуйся, вместо тленных нетленная стяжавый:

радуйся, гордость мирскую поправый.

Радуйся, Духом Святым наученный:

радуйся, не книжный паче книжных просвещенный.

Радуйся, Феодосие, великий чудотворче.

Кондак 3

Сила Вышняго осени твое сердце, преподобне отче Феодосие, яко тебе, в Спасительной обители Бога ради неусыпно потрудившася, и к чудотворной раце преподобнаго Дмитрия неленостно прибегавша, яви соучастника святости его, с нимже и ныне водворяешься в горней обители, дивному во святых своих Богу всегда вопия: Аллилуиа.

Икос 3

Имуще тя, отче Феодосие, преподобный Дмитрий Прилуцкий, паче прочих избрана и любезна, предуготова тя к вящшим подвигом спасительным, егда от междоусобия Российских вельмож, и от Казанских татар и черемис, многия скорби, имущия быти предрече, таже победу над оными и конечное разорение царства Казанскаго провозвести, да и ты с ним предстанеши ко Господу с теплым своим предстательством: мы же введуще вся сбывшася, и уразумеюще тя крепка молитвенника о душах наших, вопием ти:

Радуйся, во плоти удостоенный собеседования со святым Дмитрием:

радуйся, великий благочестия столпе.

Радуйся, зеркало совершеннаго терпения:

радуйся, миролюбцев обличителю.

Радуйся, сластолюбцев наказателю:

радуйся, враждебных исправителю.

Радуйся, малодушных утешителю:

радуйся, к воздержанию путеводителю.

Радуйся, к трезвенному житию наставниче:

радуйся, во унынии закосневающих исправителю.

Радуйся, многих ко Господу обративый:

радуйся, козни лукаваго победивый.

Радуйся, Феодосие, великий чудотворче.

Кондак 4

Буря ярости и зверство безбожных, многих братии твоея зле исторгая жизнь при очесех твоих, велия причины тебе скорби и тесноту: обаче ты, яко доблий воин Христов, мужественно молитвою себе вооружая, под ударами злобы не изменился еси, всегда вопия Богу: Аллилуиа.

Икос 4

Слышав игумен от братии твое терпеливодушное в безмолвии житие, преблаженне, по разхищении погаными, аще и нехотяща отлучитися святых обители, восхоте послати тя во град Тотьму на строение соленаго варения, ты же Апостольскими стопами послушания ради шествовав, путь твой добре совершил еси, сего ради сретаем тя приветствии сими:

Радуйся, иго Христово и бремя Его понесший измлада:

радуйся, не обративыйся вспять в шествии до горняго града.

Радуйся, во умерщвлении страстей добре подвизавыйся:

радуйся, в духовном мужестве с древними отцами сравненный.

Радуйся, молитвами твоими дивная сотворивый:

радуйся, господствию духа плоть покоривый.

Радуйся, миром небесным приосененный:

радуйся, долготерпения искусу стяжавый.

Радуйся, земная мудрования презревший:

радуйся, единого Господа вседушно поискавый.

Радуйся, сохранивший невредно целомудрие:

радуйся, яко верный раб пред Господем во вся дни благочестно шествовавый.

Радуйся, Феодосие, великий чудотворче.

Кондак 5

Боготечная звезда явился еси в стране Тотемстей, всеблаженне, на путь спасительный к вечному небесному отечеству ведущая, егда примером верных души назидая, научил еси я благодарно пети Богу: Аллилуиа.

Икос 5

Видевый, преподобне отче, в варницах соли огненный жар велий, мысленно представлял еси себе жестокость огня в грядущем веце, на грешников нераскаянных уготованнаго, и внегда пребывал при варении пищных соли, имея служащия люди, яко присныя себе чада, всегда внушал еси им страх Божий, растворяя солию слова Божия, сам же на большыя подвиги к добродетели поучался еси, темже вопием ти:

Радуйся, образе кротости духовных:

радуйся, умертвивый плоть твою постом и бдением.

Радуйся, умертвивый язык твой на глаголение тщеты:

радуйся, умертвивый уши твои на слышание глагол душевредных.

Радуйся, умертвивый руки на грабление и творение зла:

радуйся, умертвивый чрево на объядение и пьянство.

Радуйся, трудами мертва соделавый чресла своя на нечистоту:

радуйся, умертвивый ноги к течению на совет нечестивых.

Радуйся, на камени Христовою верою утвержденный:

радуйся, Божиим свидетельством возвышенный.

Радуйся, не прением, но верою возмощавый научивый:

радуйся, не книжный, многих книжных посрамивый.

Радуйся, Феодосие, великий чудотворче.

Кондак 6

Проповедник немолчный явился еси всем зрящим тя, Преподобне, премудрости Евангельския, всегдашняя чистоты и мужественнаго терпения, аще и в безмолвии хранил еси в сердце твоём сокровище веры, надежды и любви, и воспевал еси Богу: Аллилуиа.

Икос 6

Возсия богохранимой души твоей истинный боговедения свет, егда начал еси помышляти о создании новых обителей при граде Тотме, и вселитися ту, знаменуя тем Божие людем благословение, а о благоденственной их жизни могущественное к Богу предстательство: мы же, видевше твое, Преподобне, не точию о себе, а паче о спасении ближних попечение, воспеваем тя сице:

Радуйся, сродники по плоти Христа ради оставивый:

радуйся, всю надежду на Него возложивый.

Радуйся, любве нелицемерныя хранителю:

радуйся, служителю Божий, о верных Бога умоляй.

Радуйся, наставниче грешных к небесным направляй:

радуйся, и словом и житием поучай.

Радуйся, образе агнцем и пастырем:

радуйся, блаженныя вечности искателю.

Радуйся, непостижимыя славы Святых созерцателю:

радуйся, струя напаяющая благочестием церковь.

Радуйся, светильниче, непрестанным богомыслием сияющий:

радуйся, свещнице, любовь к Богу и ближнему светящий.

Радуйся, Феодосие, великий чудотворче.

Кондак 7

Хотя обещанное Богу исполнити, приял еси путь ко игумену и братии, они же, и не хотяще разлучитися с тобою, с честью из обители тя проводиша. Шедше убо в путь свой радуяся, егда достигл еси места, к сооружению обители, назначаемого на берегу Ковды реки, водрузив крест, Богу с радостными слезами возопил еси: Аллилуиа.

Икос 7

Новыя радости и благодарения Богу излиал еси слезы, Преподобне отче, егда прешед реку и возшед на гору, поставил еси кущу и водрузив крест на месте, назначаемом для сооружения храма, с коленопреклонением и со слезами моляся, рекл еси: «благословен Бог, иже показа ми место, идеже вселюся в век века» сего ради вопием ти:

Радуйся, от горы сея возшедый на гору небесную:

радуйся, древним общежития начальником уподобивыйся.

Радуйся, истинный Богу поклонниче:

радуйся, великий Ему угодниче.

Радуйся, делателю винограда Христова неленостный:

радуйся, благий и верный Его рабе.

Радуйся, данный ти талант благочестия возрадивый:

радуйся, в мале быв верен, над многими ныне поставленный.

Радуйся, горлице пустыннолюбная:

радуйся, древо, посреде происходящих вод насажденное.

Радуйся, грядущая яко настоящая предсказавый:

радуйся, душевныма очима выну Господа созерцай.

Радуйся, Феодосие, великий чудотворче.

Кондак 8

Странно бе видети, како убогий старец един обитает в пустыне на горе, презирая видимых и невидимых врагов, возлюбленный же им град обитель тому устроити и святынею обогатити тщится, мы же очима нашими вся по воле его от Бога совершаемая зряще, благодарно Ему

вопием: Аллилуиа.

Икос 8

Весь, пречудный Феодосие, душою и телом посвятил еси себе Богу, пребывая в непрестанных трудах, молитвах, постех и бдениих, еже видевше окрестнии людие, кротости и терпению твоему дивящися, начаша служить потребными к построению святых обители: о чем ходатайствовати трудолюбно потекл еси в град царствующий к великому Князю. Мы же подвиги твоя восхваляем сице:

Радуйся, совершенный в добродетелех человек:

радуйся, ленивых подвигнувый твоими нравами.

Радуйся, кротости навикнувый от Агнца вземлющаго грехи мира:

радуйся, за подвиги получивый вечная благая.

Радуйся, щитом веры стрелы лукаваго разжженных угасивый:

радуйся, молитвою и постом главу ему сокрушивый.

Радуйся, предводителю добрый в пути спасения:

радуйся, преспевавый добродетельми и трудами.

Радуйся, умерщвлением страстей миру умерый:

радуйся, возделыванием добродетели живый Богови.

Радуйся, себе самага, яко юнца в жертву Богу посвятивый:

радуйся, светильниче, елеем благодати кипящий.

Радуйся, Феодосие, великий чудотворче.

Кондак 9

Всякое естество Ангельское удивися твоим подвигом и Христоподрожательному житию твоему: почитаху бо тя и на земли во время трудов твоих жившии, не яко проста человека, но яко Ангела Божия посреде их светящися и премудростию учения в добродетели всех превосходяща, мы же прославляющемуся чрез тебе Богу взываем: Аллилуиа.

Икос 9

Витийство человеческое твое о Христе мужество, всеблаженне, изрещи не может, яко преуспевая во бдениих и пощениих, веригами тяжкими и власяницею облеклся еси, претерпевая болезни любве ради Божия, плоть твою духови поработил еси. Сего ради вопием ти:

Радуйся, алкая и жаждающая правды, ныне насыщаешься:

радуйся, в послушание Богу Отцу себе отдавший.

Радуйся, нищетою твоею Богу Сыну подражавый:

радуйся, чистоту твою Богу Духу сохранивый.

Радуйся, во плоти ангельски поживый:

радуйся, воине Христов непобедимый.

Радуйся, куплями житейскими не обязавыйся, да Воеводе угоден будеши:

радуйся, не восхотевый двема господинома работати.

Радуйся, от юности на плоть, мир и диавола вооруживыйся:

радуйся, сих врагов славно победивый.

Радуйся, отец по духу чадолюбивый:

радуйся, обитель дивну насадивый.

Радуйся, Феодосие, великий чудотворче.

Кондак 10

Спасти хотя душу твою, славы мирския всемерно бегал еси, и егда окрестнии народи начаша ты яко велия о Христе подвижника почитати, ты во граде пред всеми явно сладкими питался еси, и от безумных людей укорения и биения с радостью претерпевал еси, Богу яко в тимпане, во умерщвлении телесе непрестанно вопия: Аллилуиа.

Икос 10

Стена ограждающая от всех прилогов диавольских был еси братии, паче по кончине твоей, в ней же о прославлении обители и заступлении требующих твоих молитв предрекл еси, ныне убо, по предречению исполняемая зряще, благодарно вопием ти:

Радуйся, душу свою за человеки положивый:

радуйся, от обители земныя в небесную преселивыйся.

Радуйся, душою тамо, телом zde пребываяй:

радуйся, от мощей твоих недугов целения источаяй.

Радуйся, в великих подвизех течение совершивый:

радуйся, розго мног плод о Христе сотворшая.

Радуйся, грозд винный питающий и веселящий нас:

радуйся, омраченныя просветивый.

Радуйся, просвещенныя утвердивый:

радуйся, отрада к тебе прибегающим.

Радуйся, России на сопротивных победу содевающий:

радуйся, всем правоверным прошения исполняющий.

Радуйся, Феодосие, великий чудотворче.

Кондак 11

Пение немолчное принося Святей Троице о сохранении и укреплении Всероссийскаго царства, и всей державе Российстей от силы в силу приходящей, моли спастися, да с радостию вопием Богу: Аллилуиа.

Икос 11

Светозарный светильник явился еси, егда мощей твоих просветился еси нетлением, источая свет благодати Божия целебными дары твоими: сего ради мы яко чада церкви Христовы стекающесея, благодарственная принося Богу, вопием к тебе:

Радуйся, преисполненный всякия благостыни:

радуйся, милости превеликия сокровище.

Радуйся, промысления о людех приятелище:

радуйся, крине райскаго селения.

Радуйся, миро Христова благоухания:

радуйся, древо чудоточное рая Иисусова.

Радуйся, чаше, изливающая токи милосердия Божия:

радуйся, чудес пучино, свыше излиянная.

Радуйся, иноков удобрение:

радуйся, всея России укрепление.

Радуйся, Тотемская похвало:

радуйся, всех смиренномудрствующих славо.

Радуйся, Феодосие, великий чудотворче.

Кондак 12

Благодать цельбы стяжавшаго, преподобнаго Феодосия почтим сердцем и усты, и да вящшую воздадим почесть святым его мощам, потщимся всемерно подражати вере его, всегда вопия прославляющему Святых своих Богу: Аллилуиа.

Икос 12

Поюще твое, святе Феодосие, теплое предстательство, от врагов видимых и невидимых скорое заступление, призывающе тя умильно просим, не возгнушайся нас грешных, но услыши вопиющих тебе:

Радуйся, всякий недуг телесный и душевный врачующий:

радуйся, в невечернем дни царствия Божия приснопочивающий.

Радуйся, злых помыслов прогонителю:

радуйся, беснуемых скорый целителю.

Радуйся, закосневающих грешников исправление:

радуйся, немолчный наставниче.

Радуйся, ломотная и опухолевая болезни уврачевавый:

радуйся, трясовичная и огневицная недуги отгнавый.

Радуйся, слепым прозрение даровавый:

радуйся, хромым и расслабленным хождение исправляй.

Радуйся, в Бозе нам потребная созерцающий:

радуйся, многим прошения предваряющий.

Радуйся, Феодосие, великий чудотворче.

Кондак 13

О, великий чудотворче Феодосие! Моление наше приемши, умоли подвигоположника Иисуса, да избавит царствующия грады и всякий град и страну Христианскую от нахождения иноплемных, от ересей и расколов, от болезней и грехов и от всякия напасти, да с тобою в селении праведных сподобимся пети триипостасному Богу: Аллилуиа.

Кондак 13 глаголи трижды. А по сем читается Икос 1 и Кондак 1

Молитва преподобному отцу нашему Феодосию, Тотемскому чудотворцу

О, добрый наш пастырю и богомудрый наставниче, преподобне отче Феодосие! Услыши нас грешных, молящихся тебе, и призывающих в помощь скорое предстательство твое: виждь нас грешных в толицех обстояниях сущих, виждь нас немощных отсюду уловляемых, всякаго блага лишенных и умом от малодушия помраченных: потщися, угодниче Божий, не остави нас в греховном плену быти, да не будем в радость врагом нашим, и не умрем в лукавых деяниях наших. Моли о нас недостойных Спаса Господа, Емуже ты со безплотными лики предстоиши. Милостива к нам сотвори Содетеля нашего в нынешнем веце и в будущем, да не воздаст нам по делом нашим, и по нечистоте сердец наших, но по Своей благодати воздаст нам: на твое бо ходатайство уповая, твоим предстательством хвалимся, твое заступление на помощь призываем и к цельбоносному гробу твоему припадая недостойнии исцеления просим: избави нас, угодниче Христов, от злых находящихся на нас, и укроти волны страстей и бед возстающих на нас, да ради святых твоих молитв не обимет нас напасть, и не погрязнем в пучине греховней и в тине страстей наших. Моли, преподобне отче Феодосие, Христа Бога нашего, да подаст нам мирное жителство, оставление грехов, душам нашим спасение и велию милость. Аминь.